

lis Gnovis

■ **PASSARIAN.** Scuelis e lenghis locals

Lis scuelis ch'a intindin di dâsi in note pal concors «Salva la tua lingua locale», inmaneât pal VIII viaç de Union des Pro loco e de clape «Ali Lazio», chest an, a varan timp fintremai ai 31 di Març. Te organizazion e colabore ancje «E. I. P. Italia-Scuola Strumento di Pace». Si podarà concori tes Sezions «Poesie», «Prose» e «Musiche» (www.salvalatualinguale.it/wp/il-bando-dellottava-edizione-del-premio-per-le-scuole).

■ **MANIÀ.** Cognossi lis jerbis su la rêtet des rêtes

Ogni joibe, fintremai ai 30 di Març, a tornin lis convignis «on line» di «Natura&Colore», cu la rubriche «Esperti in erbe!». I apontaments a saran ufierts dal Ecomuseu des Dolomitis dal Friûl occidentâl «Lis Aganis», a 20.30 su la plateforme «Zoom». Tal lûc internet www.ecomuseolisaganis.it, si pues tornâ a viodi ancje lis convignis des setemanis stadis.

■ **PEONIS.** Al bar «Bottecchia»

Ottavio Bottecchia al è stât il prin ciclist talian a vinci il Tour de France tal 1924, tignint la maie zale di prin in classifiche de prime ae ultime tape, e vincint ancje la edizion dal 1925. Tal 1927 al fo



cjâtât par tiere, muribont, tra Cumins e Peonis, dulà che al lave a alenâsi, e pôc dopo al muri tal Ospedâl di Glemone. Secont la version ufiçial, al sarès colât a cause di un malôr, ma a'ndi forin fatis ancje altris suposizions, cence che si rivàs a stabili ad implen la veretât. E propit a Ottavio Bottecchia al podarès jessi intitulât il bar che, daspò di cuindis agns di latitance tal país di Peonis, al varès di jessi screât chesta Vierte te sô place, grazias a une siore dal puest che e à rispuindût a un bant dal Comun. Peonis, cussi, al varà di gnûf un puest dulà no dome bevi un tai di chel bon (e cuisâ cetante sêt indaûr che a varan chei di Peonis), ma ancje un lûc dulà cjatâsi par stâ un pôc intune, magari prime che al rivi «chel di Peonis», o ben il sium, come che si diseve une volte.

■ **CODROIPI.** A bati il stucifis a man

E je restade la ugnule famee in Italie a bati ancjemò il stucifis a man. E je la famee Zoratto, che la si cjate a Codroip, des bandis dal parc des risulivis, dulà che al è ancjemò atif e funzionant il «Mulin di Bert», che di agns a'ndi à une vorone. Po ben, i Zoratto a àn scomençât a bati il stucifis a man tal 1782, e a no si son mai fermâts, fasint in mût che la lôr meretorie ativitât e passàs di pari in fi. Une ativitât che a àn simpri cirût di mandâ indevant cuntun voli ae sostenibilitât e ae cualitât dal prodot, doprant materiis primis di grant presi, une lungjie esperience e la aghe che e mof lis palis dal mulin vier. Umberto Zoratto, cul fi Christian, a jerin, fintremai a pôc timp indaûr, i ugnui batidôrs di stucifis a man in Italie, che cul lôr lavôr a custodivin ancje un mistîr antic, che cun chel a jerin rivâtas a fâsi cognossi e stimâ parfin in Thailandie. Umberto, pôc timp indaûr, a cause di une malatie, al à lassât bessòl il fi Christian a bati a man il stucifis, ugnul batidôr di dute la Italie.

Miercus 22 Miercus de Cinise

Joibe 23 S. Livi martar

Vinars 24 S. Sergji di Cesaree m.

Sabide 25 S. Cesari martar

Domenie 26 | Domenie di Cuaresime

Lunis 27 S. Gabriel de Dolorade

Martars 28 S. Roman abât

Il timp Bielis zornadis.



Il soreli
Ai 22 al jeve aes 6.59
e al va a mont aes 17.43.



La lune
Ai 27 Prin cuart.

Il proverbi
L'amôr di Carnevâl al mûr in Cuaresime

Lis voris dal mès
Se nol è un frêt cjanin, si tache a dispeâ lis vits
e ancje i pomârs. Intal zardinut, se il teren nol
è glaçât, si pô plantâ la salvie, il tim, l'osmarin.

Di gnûf i Langobarts in Friûl

Cetancj i sucès internazionâi
pai docu-films
de associazion Invicti Lupi

Dut al ven fat cun grande passion, par dâur vite a une epoche e a un popul une vore lontans tal timp, ma che a àn fat la storie dal Friûl: i Langobarts. O stin fevelant di un grup cun socis dai 16 ai 50 agns di età, che si dâmin «Invicti Lupi» (www.invictilupi.org); la lôr sede e je a Romans dal Lusing, li che tal 1986 e je stade cjatade une des plui grandis necropolis langobardis di dute la Italie. «Il nestri obietif al è fâ divulgazion storiche – nus à dit il president de socie, **Matteo Grudina** –; o sin une vore atîf tes scuelis, te ideazion e produzion di materiâl su cjarte, audio, video e tes rievocazions storichis, li che o doprin imprescj fats di pueste par jessi il plui pussibil compagns dai originâi antîcs».

■ **Cuant ise nassude la vuestre associazion?**

«Tal 2011. Sin dal imprin, o vin chêt di fâ cognossi la societât, lis tradizions, la storie, la art, la mentalitât di chest grant popul, rivât in Friûl tal sest secul. Ogni an o inmanein la plui grande rievocazion storiche de ete langobarde di dute Italie: o prontin, cul jutori di cui che al vûl dânu una man, ce che al covente par dâi vite a un barcon sul Friûl di 1.300-1.400 agns indaûr».

■ **Isal facil rivâ adore a tornâ a creâ un mont cussî lontan tal timp?**

«Sigûr di no, o cirin fûr plui informazions pussibilis dai esperts di storie e archeologie di chenti e dai museus sul popul langobart vie pe Italie, tacant di chel nazional di Cividât. In plui, o podin fondâsi su la Historia Langobardorum di Pauli Diacon, pardabon une opare siore che e conte la lôr realtât, finide di scrivi tal 789».

■ **Cul là dai agns si sês cussî perfezionâts tant di rivâ a produci**

Il grup di passionâts dai Langobarts (foto di Andrea Mocchiutti/amok/photo)

Apontament
ai prins di Jugn
a Romans
dal Lusing
par une grande
rievocazion
storiche

■ **docu-fims e curtmetraçs.**

«Si, il nestri «Langobardi-Alboino e Romans», docu-film di 53 minûts, al è stât preseât une vore a nivel talian e internazionâl, tant di vinci fin cumò 29 prins premis e di jessi stât selezionât par 42 voltis jenfri lis miôr voris intai festivaî cinematografics che o vin cjapât part in Europe, Americhe e Asia. No dome: i nestris «Il Guerriero longobardo» e «La ritualità della morte» a àn ancje vût bon acet».

■ **Parcè la vuestre produzion aie cussî tant sucès secont lui?**

«Par vie che o vin chêt di contâ la societât di chest popul te maniere plui autentiche pussibile, dant impuartance a ogni detai, come la monture dai vueris e i vistis di ogni cêt sociâl. O volin meti in pîts une riproduzion une vore fedèl ae realtât di tancj secuî indaûr e no fâ une sorte di spettacul plui cinematografic che altri: a coventin studi, impegn, voie, passion e colaborazion, cence mai dismenteâsi che o sin un grup di volontaris».

■ **Vêso mai ricevût contribûts publics?**

«Un alc sì, massime dal Comun di Romans e de Regjon, ancje par paia il regist, i cameraman, i montadôrs dai

nestris videos, ma pal rest a son bêçs che a vegnin fûr des nestris sachetis».

■ **E cumò ce proçets staiso puartant indevant?**

«O stin registrant altris doi docu-films: un dedicât ae figure de femine langobarde, tratant ogni singul aspîet de sô vite in famee e inte societât, e un ae religion, cul delicât passaç di chest popul dal paganisim al cristianisim. Il prossim apontament par là indaûr tal timp e vivi tun vilaç langobart riprodusût di noaltris al sarà dai 9 ai 11 di Jugn propri a Romans, cu la decime prime edizion de rievocazion storiche «Romans Langobardorum»».

H.A.

Udin, Messe par furlan

A Udin, la Messe par furlan e ven cjantade sabide ai 25 di Fevrâr aes 5 e mieze soresere, li de capele «de Purità», daprûf dal domo (cun Radio Spazio che le trasmet sul moment). Al compagnarà la celebrazion il Côr S. Nicolau e S. Zorz di Colorêt di Prât. Al disarà messe pre G. Gabassi.

Tradizions furlanis dal mès par cure di Mario Martinis

IN FILE

Jenfri la fieste di Sant Valentin (14-II) e chêt di Sant Josef (19-III), vâl a di cul slungjâsi de lûs des zornadis, tes diversis zonis agrariis dal Friûl si sierave la tradizion une vore pandude des «veg-lis». Començadis ai prins di novembar, lis veglis si tignivin ogni sere intes cjasis contadinis, ator dal fogolâr, o intes stalis scjaldadis dal flât dei nemâi, cuant che dopo cene si cjatave dute la famee, ma ancje altris parencj e amis di borgade, par fâ i piçui lavôrs di contadinance. Di là di jessi centri di agregazion familiâr e comunitarie, chestis riunionis a jerin ancje un veicul di comunicazion sociâl e di scambi di informazions e cognossincis cuant che no esistevin gjornâi, radio e television. Tal lusôr palit di une lum a petrolio o di un ferâl si contavin storiis e leiendis dal lûc, si vignive a savê dai torzeons fats, gnovis, ideis e usancis ancje di país lontans, si mangiave e si beveve alc in compagnie biel che i oms a justavin imprescj di lavôr o a intiesevin zeis di vens o sportis di scus, intant che lis feminis a filavin o a lavoravin cul feret. Cheste e



jere une ativitât feminine che e veve tirât dongje tancj riferiments di caratar ritual peâts aes antighis culturis dal Mediterani, dula che, par esempli, il fûs al jere diventât il simbul des divinitâts protetivis di soreli jevât. Une volte che chestis divinitâts a scomparirin e a lassarin il puest a figuris mitichis populârs plui sclagnis come la Epifanie, il Carnevâl e la Cuaresime ancjemò vivis tes tradizions dal popul fintremai ai prins dal Nûfcent. Simpri secont la superstizion, al jere improibit davuelzi cheste ativitât feminine, dai aspîets ancje signestrîs, in soregnots precis dal calendari e in ciertis joibis, massime dongje il solstizi d'unvier, cuant che, secont lis crodincis dal popul, a jerin in moviment striis e altris fuarcis negativis peadis aes datis di fonde dal grant cercli dal an, justepont come i solstizis, i ecuinovis e lis datis criticis di mieze stagion. Infin, in ciertis zonis dal Friûl di soreli a mont e jere vive la tradizion di sierâ il periodi de filadure cu la esposizion dai prodots filâts e cuntune mirinde in comun (possen) prontade des feminis e des fantacins.